

Kontuola

ANTZUOLA / Egubakoitza / 2004eko martxoaren 12a / 193. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

Ezohiko osoko bilkura egingo du Udalak, Izartu programarako proiektuen gainean

AINTZANE IRIZAR

Datorren eguaztenean, hilak 17, ezohiko osoko bilkura egingo du Udalak, Izartu programara zein proiektu aurkeztuko dituen erabakitze-ko. Horrekin lotuta, Gertu Gae plataformak hainbat kritika egin dizkio Udalari, eta alderdikeriaz diharduela esan du.

Udaleko arduradunek azaldu digutenez, dirulaguntzak lortzeko Izartu programara aurkeztuko dituzten proiektuetan aldaketa batzuk izango dira. Ez digute, baina, zehaztasun gehiagorik eman. Badirudi Izartu programaren laguntzak jaso ahal izateko bete beharreko hainbat baldintza aldatu egin dituela Eusko Jaurlaritzak. Martxoaren 22a da proiektuak Jaurlaritzari aurkezteko azkeneko eguna.

Izartu programarekin, Eusko Jaurlaritzaren helburu nagusia da gainbehera datozen edo ekipamendu gutxi dituzten guneei laguntzak ematea eta berpiztea.

Urtarrilean, Udalak programa horretarako prestatu zituen proiektuen berri eman zuen. Jose Angel Zabalo alkateak, Joxe Joan



Urtarrilean aurkeztu zituen Izartu programarako proiektuak Jose Angel Zabalo alkateak, diputatu nagusiarekin batera.

Gonzalez de Txabarri diputatu nagusiarekin batera, jendaurreko agerraldia egin zuen Olanan etxean, herritarrei proiektuen berri emateko.

KIROLDEGIA EGINGO DUTE

Gertu Gae herritarrei zuzendutako idatzi baten bitartez esan du Izarturen bigarren deialdi honetatik kanpo geratu dela kirolde-

giaren proiektua. Horri erantzunez, Udaleko arduradunek esan digute agintaldi honetan proiektu hori aurrera eramateko asmoa duela Udalak.

Gertu Gae esan du kiroldegiaren proiektua ezin izango dela aurkeztu Izartu programara

Oraingo hau Izartu programaren bigarren deialdia da. Lehendabiziko deialdian ere —aurreko agintaldian— hainbat proiektu aurkeztu zituen Udalak, baina, ez zuen laguntzarik jaso. Gertu Gaeren esanetan, erabaki hori zela eta, epaitegietara jo zuen Antzuolako Udalak, Lasartearekin batera. Horrela dio Gertu Gae plataformaren idatziak: "Apartheid egoeratik sortutako udalbatzarrak (PNV-EA) auzitegietako bidea baztertzearabaki zuen, alkatearen alderdi bereko politikarien promesetan oinarrituz. Alderdi interesak herriaren interesen gainetik jarritz. Orain jakin dugu Lasarteko Udalak auzia irabazi egin duela eta Gasteizko gobernuak derri gorrez ordaindu beharko diola egokitzen zaiona".

KIROLA

Juanito Oiartzabalek hitzaldia egingo du martxoaren 18an

Martxoaren 18an, eguna, urteko batzar orokorra egingo du Arrola mendi elkarteak, 19:00etan, Olanan etxean. Hantxe, iazko irteeren balantzea egingo dute, eta aurtengo ekintzen berri emango dute. 2003an, 18 irteera egin zituzten, eta batez beste, 30 bat lagunek parte hartu zuen irteera bakoitzean.

Bestalde, zuzendaritza batzordean hainbat aldaketa egingo dituzte. Jose Mari Iturbe oraingo presidenteari, esaterako, kargua lagatzea egokitzen zaio.

Zuzendaritzako kide berriak, baina, aurrerago aukeratu dituzte, beste batzar baten.

JUANITO OIARTZABAL ETORRIKO DA

Batzar orokorraren ondoren, 19:30ean, Juanito Oiartzabalen hitzaldia eta diapositiba emanaldia izango dugu, Olanan etxean bertan.

Hamalau zortzimilako gainean jardungo du Oiartzabal mendizaleak; hala, harekin solasaldia egiteko aukera izango dute bertaratzen direnek.



Juanito Oiartzabal mendizalea.

LABUR

Presoen senideei dirulaguntzak emateko araudia onartu dute osoko bilkuran

Aurreko asteko egubakoitzean, martxoak 5, egindako osoko bilkuran onartu zuen udalbatzak presoen senideei dirulaguntzak emateko araudia. Espetxera bisitara joateagatik senideek izandako gastuak ordaintzeko bakarrik emango da diru hori. EAEtik kanpo espetxeratuta dauden presoen senideek izango dute laguntza jasotzeko aukera. Kilometro bakoitzeko 10 zentimo jasoko dute. Gehienez, hiru bidaiarako laguntza jaso ahal izango dute.

Emakumeen eta presoen eskubideen gaineko mozioak onartu ditu Udalak

Martxoko osoko bilkuran bi mozio onartu zituzten. Batetik, Gipuzkoako Batzar Nagusiek proposatuta, presoen eskubideen aldeko mozioa. Presoak Euskal Herrira ekartzea eta gaixotasun sendaezina dituztenak, bereziki, Manu Azkarate aske lagatzea eskatzen da, besteak beste. Bestetik, Elvira Kortajarena PSE-EEko zinegotziak aurkeztuta, emakumeen eskubideen aldeko mozioa onartu zuten.

INGURUMENA

Tokiko Agenda XXI garatzeko hitzarmena

AINTZANE IRIZAR

Tokiko Agenda XXI betetzeko eta garatzeko konpromisoa hartu du Udalak. Mankomunitatearen, ibarreko udal guztien, Diputazioaren eta Ihobe elkarte publikoaren artean lankidetzaren hitzarmena sinatuko dute aurki, Tokiko Agenda XXI diseinatzen hasteko.

1992an Rio De Janeiron egindako Lurrari Buruzko Gailurrean, garapen jasangarriaren aldeko hainbat irizpide finkatu zituzten, Agenda XXI izenarekin. Helburu nagusia da garapena, berdintasuna, demokrazia eta solidaritatearen izenean, Agenda XXI mende honetako agenda politiko bihurtzea. Bizi kalitatearekin eta ingurumenarekiko errespetuarekin lotuta dago agenda hori, eta hiru ardatz nagusi ditu: ekonomia, gizartea eta ingurumena.

Jaurlaritzak hartutako konpromisoaren arabera, 2006rako, EAEko 5.000 biztanletik gorako udal guztiek diseinatuta izan beharko dute Tokiko Agenda XXI. Debagoieneko udalen kasuan,

denek batera diseinatuko dute. Horrela, Antzuolako Udalak Debagoieneko gainerako udalekin batera, *Udaltalde XXI Debagoiena* osatuko dute, plan hori diseinatzeko eta garatzeko.

LANKIDETZA HITZARMENA

Udaltalde XXI Debagoiena proiektua eratzeko eta aurrera eramateko, lankidetzaren hitzarmena sinatuko dute, Debagoieneko Mankomunitateak, Gipuzkoako Foru Aldundiak, Ihobe elkarte publikoak eta ibarreko udal guztiek, hala onartzen baldin badute. Hitzarmen horretan oinarrituta, 2004. urterako kudeaketa plana ere finkatuko dute, eta honako aurrekontua izango du plan horrek: 60.000 euro aholkularitza gastuetarako, eta 40.000 euro komunikazio planerako.

Hitzarmena sinatuko duten guztien artean ordaindu beharko dituzte gastu horiek, guztira, 100.000 euro. Udalen kasuan, denen artean urteroko kudeaketa planaren %20 ordaindu beharko dute, Mankomunitateari egiten dizkioten ohiko ekarpenen bidez.



Baserritarrek bazkaria egin zuten

Aurreko zapatuan Aingeru Guardakoaren eguna pasatu dela eta, baserritarrek bazkaria egin zuten, ermandadeen ohiturari jarraituz. Garai baten, ermandadeetan antolatzen ziren baserritarrek; horien helburua zen norbaiti behiren bat hiltzen zitzaionean denen artean ordaindu eta okela banatzea. Gaur egungo aseguruaren papera betetzen zuten./A.I.

LABUR

Olaranen eman beharko dugu botoa, domekan

Iazko udal hauteskundeetan bezala, bi mahai jarriko dituzte domekako hauteskunderatarako. Biak egongo dira Olaran etxeko beheko solairuan.

Mahai baten, 839 herritarrek eman ahal izango dute botoa; beste mahaian, berriz, 808 lagunek izango dute botoa emateko aukera. Guztira, 1.647 boto-emaile; datu horretan, baina, atzerrian bizi diren antzuolarrak kontuan hartu gabe daude. Orain dela lau urteko hauteskundeetan, 1.617 hautesle zeuden Antzuolan.

Oraingo asteburuan ez dute zabalduko erakusketa

Aurreko asteburuan, Anelkarrek antolatuta, zabaldu zuten Amnesty Internationalen emakumeen gaineko erakusketa. Oraingo asteburuan, baina, ez da zabalik egongo.

Hurrengo asteburuan, martxoaren 20an eta 21ean, zabalduko dute berriro erakusketa.

HERRITARREN HITZA / Alaitz Jauregi · Gizarte laguntzailea

Lehenengo garaixak ala orainguak nahixago?

Orain, bene-benetan esan zenbat aldiz esan doazuen: "aiiii...lehenengo denboretan..."; bai, bai, esaldi tipikua, baina zelako egixa! Gaztetxotantontokerixak direla pentsatzen jakun, baina urtien buruan, poliki-poliki, geuri irtetzen doskue. Zergaittik esaten doten hau? Gauzak, normala dan bezela, asko aldatzen direlako; eta eskerrak, bestela Francon garaixan estankatuta egongo ginake. Orain, askatasun gehixago dago. Zertan? Pentsatzeko eran, esaterako; lehen dana pekatua zan, eta orain pekatu rik egitten ez dabena, tontua.

Matxismua be indarra galtzen doia poliki-poliki (oraindik be berdintasuna ametsa dan arren). Herrixak be askoz hobeto daude preparatuta aisialdirako, lanerako, komodidatetarako... Garraio aldetik be ez dittugu lehen beste kilometro egitten oinez; ze etxetan ez daude bi kotxe, gutxienez? Ta astebukaeretan, zer? Lehen, bazkaldu orduko erromerixan zeuden; orain, berriz,



"Lehen dana pekatua zan; orain, pekatu rik egitten ez dabena, tontua"

hilabete lehenago hasi bihar da zineko karteleretara gerturatu ta erabakitzen: hainbeste areto eta aukera, eta jende ilarak? Eta antzerki saio ugarixak? Eta kontzertuak? Eta...? Mundua ezagutzeko be erreztasun gehixago dago, edozein tokittako jendiakin tratatu geinke, kultura ezberdin gehixago ezagutzen dittugu, lanak asko erraztuta daude, gero ta ordu gutxiago lan

egitten da, konsumismo gehixago dago nahikua diru erabiltzen dogulako, mentalidadia asko zabaldu da... Baina honek alde ilunago bat be badauka, e! Komunetik sukaldera deitzeko mobilla erabiltzen dogu, ez daukagu idearik be ze jaten dogun, animala koittaduak euren gaitotasunak kontajiatzen doskue, egitten dogun eskulan zailena kotxeko bolantiari eraittia da, zenbat ume ikusten dira lehenengo aldian kalia jolasian? Goizian, jaiki orduko espriñian hasten gara, ez dozue pentsatzen laister umiak jaio biharri an ordenadoriak jaiko direla?

KIROLA

PARTIDUAK

FUTBOLA
Martxoak 13
16:00: Antzuola-Urnieta (2. erreg.)
Martxoak 14
12:00: Antzuola-Eibartarrak (Gazteak)

PILOTA
Martxoak 13 (Udaberri Saria)
17:00: Olalde-Altzatarra I (palet. nag.)

EMAITZAK

FUTBOLA
Behobia B 2 Antzuola 2 (2. erreg.)
Landetxa 0 Antzuola 4 (Gazteak)

PILOTA
Udaberri Saria
Ordizia-Olalde (paletaz nag.)... 35-24

zabalo
IGELTSEROTZA
Jose Luis Zabalo
Kalegoi 9, 1. solairua
ANTZUOLA.
Tel. 943 76 60 89
Faxa: 943 76 60 14

ZAHAR BERRITZEAK:
Fatxadak
Bainugela eta sukaldea
Lokal komertzialak
Teilatuak

**Eta orain....
GREMIOEN
KOORDINAZIOA**

SUKALDEKO ALTZARIAK

Harizki

MUEBLES
IGEA

Sukalderako eta bainurako altzariak
Altzari rustikoetan
espezializatuak

Zurrategi plaza 4, behea. ANTZUOLA. Tel. eta faxa 943 78 71 80